

Stadtarchiv Dornbirn, Urkunde Nr. 556

Rückseite:

Zinsbrief

Von Marcus Wehingern im Niderndorf, Gegen Herrn Hanibaln von Zinzendorf umb 10ßd
1560.

Vorderseite:

Ich Marcus Wächinger zu Thorenbüren unnd Im Niderdorff Sesshaft Bekhenn offentlich für mich all mein erben und nachkhomenn unnd thun khundt aller meniglich das ich mit wolbedachtem synn unnd gut zittigen vorbetrachtung unnd guttem vorwissenn von meins des bessern nutz wegnn, dem wolgeborenen Edlen unnd vestenn Hannybal Hern von Zintzendorff Erb Jeger maister In österreich, unnd Hanns Ulichen von schlandersperg, zum Rönsperg, unnd allen Iren Erben, als weyllend des Edlenn unnd vesten Hansen von Empß zu der Hohen Empß seligen nach gelaßnen Erben Umb Zechen pfund pfennig gutter unnd genemer diz lands werung dero ich von Inen gar und genntzlich gewert und bezalt bin, unnd die an meinen gutten nutz komen unnd gewendt sind, Ainß Stätten vesten ewigen Zinß undkoufs Auffrecht und redlich zu koffen gegeben hab In Craft diz Briefs, Zechen schilling pfennig gemelter rechts steets Järlichs unnd gewiß Ewigs Zinß und gelts zu richtten unnd zu geben Ausser unnd ab meinen zwayen Stucken rebwascher In des Heffels garten vor felixen diemen des altten Hofstatt gelegen stosst oben an die Landstrauß undan an mein aigen gutt nebendzu an Hans albrichs Erben, und zum vierden wider an mein aigen gutt, Söllich hierinn verschryben unnderpfandt sol mit aller seiner recht und gerechtigkeit mit steeg mit weg, und Namlich mit allen Zu unnd Ingehörungen, davon ganz über all nichts Ausgenomen noch hindan gesezt umb Bemelt Hoptgutt Zinß und wass dißer Brief weysett den obgedachten Hern Hannybal von Zintzendorff und Hanns Ulichen von schlandersperg, unnd aller Irren Erben, Recht behaft unnderpfand haissen und sein für frey Ledig und Los, Ausgenomen Jörgen willer den man nempt Zoller ain pfund pfenig Järlichs an dem ganzen wingarten gatt und gon sol nach Laut und Inhalt brief und sigel so er darum In hat, Sonnst vor gegen meniglichem unverschryben unnd unbekümbert sind In allweg, Demnach sollen und wöllen, ich all mein Erben und nachkomen Inn= haber obgemelten unnderpfand, den gedachten Her Hannybal, und Hanns Ulrichen und allen Irren Erben, die gemelten zechen schillings pfennig Zinß Nun hinfüro Järlich auch yedes Jars allain und besonder allweg auff sant martins tag, güettlich richten und geben, unnd die zu Iren sichern Hand und gewalt Alhie zu thorenbüren In den thurn Im oberdorff antwurten, one alle mynderung abgang Costen und schaden, unnd ouch für Aller meniglichs weren und Entweren, unnd wan ich unnd mein Erben hierin Sümig würd und disen Zins nit gebend In all weyß und mans wie obstaut, so sind und hayssett das hierin verschryben unnderpfandt mit aller seiner Zugehörd, Zinsfellig, und zu rechtem Ewigem Aigen gefallen und verfallenn denn gedachten Her Hannybal unnd Hannß ulrichen und allen Iren Erben, und nachkomen Also das sey Es furohin sollen unnd mögen Inhaben buwen nutzen niessen, versetzen verkaufen unnd damit schaffen Handeln thun und lassen, als mit andern Irem aigen gutt one mein und meiner Erben noch meniglich von unnsern wegen Sumen noch Irren weder mit noch ohne gericht Gaistlich noch weltlich In kain weyß noch weg, Unnd hieruff diz koufs unnd Zeinß, sollen unnd wöllen ich all mein Erben unnd nachkomen, recht gutt getrewe weren Haissen unnd sin für all Intrag, abgang unnd ansprach Irrung und Infall, nach dem rechten All= fort In unnsern Costen unnd one allen Irm schaden unnd wie wol dieser kauf ainen Ewigen kauf Aus wyeset so ist mir Dannocht die gnad Beschechen das ich all mein Erben und nachkomen, disen Järlichen Zinß woll wider kauffen unnd ablösen, über kurtz oder Lanng Zeit, Nunhin= furo welches Jars wir welleind, doch allweg auff ob bestimpten sannt martins, und mit dem Hoptgut Darumb Er erkaufft ist, unnd mit den Erloffnen und unbezalten Zinsen, auch git Sampt allem Costen und schaden so daruff geloffen were, und mit ob bemelter müntz und werung Alles one geverde, Unnd des alles Zu warem vestem offem Urkhund, unnd gutter Sicherhait so han ich ob genannter Marcus Wächinger

mit Ernst Erpetten den Ersamen Jacoben Böschen der Ziet unser aller genedigsten Herschaft von österreich
derer Ammann zu Thorenbüren das
Er sein Aigen Innsigel für mich unnd all meine erben offentlich gehenckt hatt an disen Breif, doch der Herschaft
Ime und seinen erben In all
weg one schaden, der geben ist am nächsten Zinstag nächst nach sant Martins tag, Nach Crysti gepurt als man
Zalt thusend fünff hundert
unnd Sechzigkh Jar.